

# ಮನರ್ ಉದ್‌ಚಿದ್

(ಕೊಡವ ಕವನ ಗೂಡ್)

ಮಾಚೀಟರ ದೊರೆ ತಿಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ

BVP-1058-91117

985-21187

ಸಾಹಿತ್ಯ ಅಕಾಡೆಮಿ

ಮಡಿಕೇರಿ



ನಂಗ ಬೊಳಪಡ್‌ತ್‌ನ ಕತೆ, ಕವನ, ಕಾದಂಬರಿ,  
ಚಲಿತ್ರ, ವಿಜ್ಞಾನ, ನಾಟಕ, ವೈಚಾರಿಕ ಲೇಖನ...

ಇನ್ನಿತ ಕೊಡವ ಪುಸ್ತಕ ಹಿಂಜ "ತೆಚ್ಚಿಲ್"

ಕೊಡವ ಕ್ಯಾಸೆಟ್ ನಂಗಡಲ್ಲಿ ಮಾರಾಟಕ್ ಉಂಡ್.  
ಬೋಂಡಿಯಾನವು ಕಾರ್ಯಾಲಯತ್ ವ್ಯವಹರಿಸಿಡಲು.

ವಿಳಾಸ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸ್ಕೌಟ್‌ಭವನ, ಜಿಲ್ಲಾ ಕ್ರೀಡಾಂಗಣ

ಮಡಿಕೇರಿ 571 201

ಫೋನ್: 08272-229074

# ಮನತ್ ಉದ್‌ಚದ್

(ಕೊಡವ ಕವನ ಗೂಡ್)

ಮಾಳೇಟರ ದೊರೆ ತಿಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ

**MANATH UDCHAD:** A collection of Kodava poems written by Sri Maletira Dore Thimmaiah Published by the Karnataka Kodava Sahitya Academy, Madikeri, during February -2006

First Edition - 2006

ಆದ್ಯ ಮುದ್ರಣ - 2006

All rights reserved

ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್

Price - Rs. 15.00

ಕ್ರಯ - ಪದ್‌ನಂಜಿ ಉರ್‌ಪಿಯ

ಪ್ರಕಟಣೆ ಸಮಿತಿ :

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ

ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ

ಶ್ರೀಮತಿ ತೀತಿರ ರೇಖಾ ವಸಂತ

ಶ್ರೀಮತಿ ಪಾಲೇರ ರಾಣಿ ಅಪ್ಪಣ್ಣ

ಬೊಳಿ ಪಡ್‌ತನವು :

ರಿಜಿಸ್ಟ್ರಾರ್, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸ್ಕಾಟ್ ಭವನ, ಜಿಲ್ಲಾ ಕ್ರೀಡಾಂಗಣ,

ಮಡಿಕೇರಿ-571 201

(ಫೋನ್: 08272-229074)

ಅಚ್ಚುಕಾರ :

ಶಕ್ತಿ ಪ್ರಿಂಟರ್ಸ್

ಕೈಗಾರಿಕಾ ಬಡಾವಣೆ, ಮಡಿಕೇರಿ - 571 201

(☎: 08272-228829, 228382)



## ಅಧ್ಯಕ್ಷಿಣಿ ತಕ್ಕ

ನಿತ್ಯ ಬದ್‌ಕ್‌ಲ್ ಕಂಡ್ ಬಪ್ಪನ್ನತ ನೀತಿ-ನೇಮ, ಆಯಿಮೆ-ಕೋಯಿಮೆ, ಆಚಾರ-ವಿಚಾರ, ವಿಷಯ-ವಿಶೇಷತೆನ ತೊಟ್ಟಿತ್ ಪೆರ್ತ್ ಚಾಯಿಲ್ ಕವನ ನೆಚ್ಚನ ಎಳ್ತಕಾರಂಡ ಸಾಮರ್ಥ್ಯ ಮೆಚ್ಚುವನ್ನತದ್. ಆಚೇಂಗಿಯೂ, ಈ ಎಳ್ತರ ಕವಿತ್ವಕೂ, ಸಾಹಿತ್ಯಿಕ ಮೌಲ್ಯಕೂ ಕೊರತೆ ಇಲ್ಲತಿಲ್ಲೆ. ಎಳ್ತಕಾರಕ್ ಕಯ್ಯುವಚ್ಚಕ್ ಒತ್ತಾಸೆ ಕೂಡ್‌ಕಂಡೊಂದೆಣ್ಣಿತ್, ತಿದ್ದಿತ್ ಸೆರಿಕೂಟಿತ್ ಪ್ರಕಟಪಡ್‌ತಿಯಂಡುಂಡ್. ಇಯಂಗಡ ಸಾಹಿತ್ಯ ಕೃಷಿ ಮೋಳಾಕೇರಿಯಂಡೇ ಪೋಕಡ್. ಇಂಞಚ್ಚಕೂ ಸಾಹಿತ್ಯ, ಪುಸ್ತಕ ರೂಪತ್ ಪೊರಬೂವಡ್. ಪುಸ್ತಕ ಎಡ್‌ತ್ ಓದುವ ಅಭಿಮಾನಿಯಡ ಸಂಖ್ಯೆಯೂ ಅದಿಯಾಕಡ್.

ಎಳ್ತಕಾರಂಗ್ ಶುಭಾಶಯ.

5-2-2006

ಮಡಿಕೇರಿ

ಉಳ್ಳಿಯಡ ಡಾಟಿ ಪೂವಯ್ಯ

ಅಧ್ಯಕ್ಷಿಣಿ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ.

## ಎಳ್ತೆಕಾರಂಡ ತಕ್ಕ

ಕೊಡವ ತಕ್ಕಲ್ ಪಿಂಞ ಕನ್ನಡತ್, ಕಥೆ, ಕವನ, ಚುಟುಕ, ತುಳಿ ಕವನ, ತಮಾಷಿ ಲೇಖನ ಇನ್ನತ ಪಲತರತಾರ ಲೇಖನ, ಕನ್ನಡ ದಿನಪತ್ರಿಕೆ, ವಾರಪತ್ರಿಕೆಲ್ ಸುಮಾರ್ ಪ್ರಕಟ ಆಯಿತ್. ಕವನ ಪೈಪೋಟಿಲ್ ಇನಾಂ ಪಡಂದಿಯೆ. ಅದೇ ಪೋಲೆ ಕೊಡವ ತಕ್ಕಲ್ ಎಳ್ತಾದಾನ ಕವನ, ತುಳಿ ಕವನ, ಚುಟುಕ, ತಮಾಷಿ ಇನ್ನತ ಸುಮಾರ್ ಲೇಖನ ಕೊಡವ ಆದ್ಯ ವಾರಪತ್ರಿಕೆ “ಬ್ರಹ್ಮಗಿರಿ”ಲ್ ಬೊಳಿ ಕಂಡಿತ್. ಸುಮಾರ್ ಎಳ್ತಾತ್ ಪೈಪೋಟಿಲ್ ಭಾಗವಹಿಸಿತ್ ಇನಾಂ ಪಡಂದಿಯೆ. ಆಚೇಂಗಿ ಇಕ್ಕಾಕಣೆ ನಾಡ ಏದೇ ಎಳ್ತಾತ್ ಪುಸ್ತಕ ರೂಪತ್ ಬೊಳಿ ಕಂಡಿತಿಲ್ಲೆ.


ಇನ್ನನೆ ಇಪ್ಪಕ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ನಾಡ ಕವನತಾನ ಪುಸ್ತಕ ರೂಪತ್ ಪ್ರಕಟ ಪಡ್ತುವಕ್ ಮಿಂಞಾಕ್ ಬಂದದ್ ನೇರಾಯಿತೂ ನಾಡ ಭಾಗ್ಯಾಂದ್ ಗ್ಯಾನ ಮಾಡುವಿ. “ಮನತ್ ಉದ್‌ಚದ್” ಎಣ್ಣುವ ನಾಡ ಈ ಕವನ ಸಂಕಲನತ್ ತುಳಿ ಕವನ ಪಿಂಞ ಬಲ್ಯ ಕವನವೂ ಉಂಡ್. ಇದ್‌ಲುಳ್ಳ ಎಲ್ಲಾ ಕವನವೂ “ಬ್ರಹ್ಮಗಿರಿ” ಪತ್ರಿಕೆಲ್ ಪ್ರಕಟ ಆಯಿತ್. ನಾಡ ಈ ಕವನ ಸಂಕಲನತ್ ಎನ್ನೇಂಗಿ ಲೋಪ-ದೋಷ ಉಂಡೇಂಗಿ ಓದುಗ ಮಾಜನ ತಪ್ಪಾನ ತಿದ್ದಿ ತಂದಿತ್, ವಿಮರ್ಶೆ ರೂಪತ್ ಅರಿವಿಕೆ ತಂದಿತ್ ಸಹಕರಿಚಿಟ್ಟಿತ್ ಸಾಹಿತ್ಯ ಕೋವುಲ್ ಇಂಞಾಚ್ಚಕೂ ಎಳ್ತಾದುವಕ್ ಒತ್ತಾಸೆ ತರಂಡೂಂದ್ ಕೇಟವಿ.

ಮಾತೇಣರ ಮೊರೆ ತಿಮ್ಮಯ್ಯ


ಬೆಂಗಳೂರ್

## ಮರ್‌ಪಕಾಗ

ಒಯಿಂಬದ್ ತಿಂಗ ಪೊತ್ತಿತ್  
 ಪೆತ್ತಿತ್ ಚಾಕ್‌ನ ಅವ್ವನ ಮರ್‌ಪಕಾಗ!  
 ಕೆಲ ಪೈಚಿತಿಪ್ಪಕ ಪೊತ್ತ್ ಕೂಳ್  
 ಇಟ್ಟಿಯಿಂಗಳ ಮರ್‌ಪಕಾಗ!  
 ಕಷ್ಟಕ್ ಆನ ಬೆಂದು  
 ಚೆಂಜಾದಿಯಳ ಮರ್‌ಪಕಾಗ!  
 ಎಳ್ತ್ ಬುದ್ಧಿ ಜ್ಞಾನತನ  
 ಪಡ್‌ಪ್‌ಚಿಟ್ಟಿಯಿಂಗಳ ಮರ್‌ಪಕಾಗ!  
 ನಾಡ್‌ರ ನಲ್ಲಮೆಕಾಯಿತ್  
 ನಯಿಚಿತ್ ತ್ಯಾಗ ಬಲಿದಾನ  
 ಮಾಡ್‌ನಯಿಂಗಳ ಮರ್‌ಪಕಾಗ!  
 ಪುಟ್ನನ ಭೂಮಿ, ಕಾವೇರಮ್ಮೆ  
 ಇಗ್ಗ್‌ತಪ್ಪನ ಎಂದೂ ಮರ್‌ಪಕಾಗ!



ತೆಳುಂಗನ ಶುದ್ಧಿ ಮನಸುಳ್ಳ  
 ಪೂ ಕುಂಞಾರ ಪೂಂದೊಳಿಯಾಯಿತ್ ಬಾ  
 ಸ್ನೇಹ ಸಮ್ಮಂದತ್ ಮೇಂಗನ ಬೆಂದುತ್ವತಾರ  
 ಆಸೆ ಅಕ್ಕರೆಕ್ ಸಕ್ಕರೆ ಪಾಲ್ ತೇನಾಯ್ತ  
 ಪುಟ್ಟಿ ಬಾ ಕವಿತಾ ಪುಟ್ಟಿ ಬಾ.  
 ಕಾವ್ಯತಾರ ಪೊಳೆಯಾಯಿತ್ ಉದ್ಭವಿ ಬಾ  
 ಲೋಕ ಕಲ್ಯಾಣಕಾಯಿತ್ ತುದ್ಭವಿ ಬಾ  
 ಜನತಾರ ಕಷ್ಟಸುಖಕ್ ಕೊದ್ಭವಿ ಬಾ  
 ದುಷ್ಟ ಜನಡ ಸಂಹಾರಕ್ ಮದ್ಭವಿ ಬಾ,  
 ಪುಟ್ಟಿ ಬಾ ಕವಿತಾ ಪುಟ್ಟಿ ಬಾ.  
 ಪೊಮ್ಮಾಲೆ ಕೊಡಗಲ್ ಪೊನ್ನಾಯಿತ್ ಬಾ  
 ಕಾವೇರಮ್ಮೆರ ಸನ್ನಿಧಿಲ್ ಪೂವಾಯಿತ್ ಬಾ  
 ಇಗ್ಗತ್ತಪ್ಪಂಡ ನಾಡಲ್ ಎಲಂಗಿಯಂಡ್ ಬಾ  
 ಹರದಾಸ ಅಪ್ಪಚ್ಚಂಡ ಆಶೀರ್ವಾದತ್  
 ಕೊಡವ ಸಾಹಿತ್ಯತಾರ ಬೊಳಚೆಕಾಯಿತ್  
 ಪುಟ್ಟಿ ಬಾ ಕವಿತಾ ಪುಟ್ಟಿ ಬಾ.





## ಪಡೆ ಬೀರ ಬಂಬಂಗ್ ನಮನ

ಪೊಮ್ಮಾಲೆ ಕೊಡಗ್‌ರ ಜಬ್ಬುಮಿಲ್  
 ಕಾವೇರಮ್ಮೆರ ಪವಿತ್ರ ಮಡಲ್  
 ಪುಟ್ಟಿತ್ ಜನ್ಮ ಎಡ್ತ್ ಭಾಗ್ಯವಂತ ನೀನ್  
 ದೇಶಸೇವಕಾಯ್ ಪೋರಾಡಿತ್ ಪ್ರಾಣ  
 ತ್ಯಾಗ ಮಾಡ್‌ನ ಪಡೆ ಬೀರ ನೀನ್  
 ನಿನ್ನ ಮರೆಯಡೆನ್ನನೆ ಇಂದ್ ನಾನ್.  
 ಭಾರತಾಂಬೆರ ದೇಶ ರಕ್ಷಣೆಕಾಯ್  
 ಎದೆ ನೋಟಿತ್ ಮಿಂಞಕ್ ನಿಂದ್  
 ಶತ್ರುವಡ ಸದ್‌ಡಕಿತ್ ಅಂದ್  
 ಪೋರಾಡ್‌ನ ಶೂರ ಧೀರ  
 ಪಡೆಬೀರ ಬಂಬ ನೀನ್  
 ನಿನ್ನ ಮರೆಯಡೆನ್ನನೆ ಇಂದ್ ನಾನ್.  
 ದೇಶತರ ಗಡಿಲ್ ಬೊಡಿರ ಸದ್‌ಲ್  
 ಕಣ್ಣಲ್ ಕಣ್ಣಟ್ಪ್ ಕುಯ್ನಿರಾಟ್‌ಲ್  
 ಕುಂದ್, ಮೊಟ್ಪ್, ಕಲ್ ಕೋರೆಲ್  
 ಮಣ್ಣರ, ಕೂಳ್‌ರ ಋಣ ತೇಪ ಮನತ್‌ಲ್

ಇರ್ಲಾ ಪೋಲ್ ಪೋರಾಡ್‌ನ  
 ನಿನ್ನ ಮರೆಯಡೆನ್ನೆ ಇಂದ್ ನಾನ್.  
 ಮಂಜಿ ಮಳೆಗಾಳಿ ಕುಳಾರ್ಲಾ  
 ಕಲ್ಲ್, ಮುಳ್ಳ್, ಜಿಕ್ಕು ಕಾಡ್‌ಲ್  
 ಬೊತ್ತತೆ ಬೊರಂಡತೆ ಬಯ್ಯಕ್ ಪಾಯತೆ  
 ಉರ್ತಮಾರಿಯಡ ಪಡೆರ ಕೂಡೆ  
 ಪೋರಾಡಿತ್ ಪ್ರಾಣತ್ಯಾಗ ಮಾಡ್‌ನ  
 ನಿನ್ನ ಮರೆಯಡೆನ್ನೆ ಇಂದ್ ನಾನ್.  
 ವೀರ ಮರಣ ಪಟ್ಟಿ, ವೀರ ಚಕ್ರ ಪಡಂದ  
 ನಿನ್ನ ಪೆತ್ತ ಅವ್ವ ಅಪ್ಪಂಗಳೇ ಧನ್ಯ  
 ಕಾವೇರಮ್ಮೆರ ನಾಡ್‌ರ ಜನಳೇ ಪುಣ್ಯ  
 ದೇಶಕಾಯ್ತ ನೀಡ ತ್ಯಾಗ ಬಲಿದಾನಕ್  
 ಇದೋ ಶ್ರದ್ಧಾಂಜಲಿರ ನಾಡ ಕವನ,  
 ಮಾಡುವಿ ನೀಕ್ ಎದೆ ದುಂಬ್‌ನ ನಮನ.



## ಬೋಡನ ಬಾರಿ ನಂಗೆಲ್ಲಾ

ಬೋಡನ ಬಾರಿ ನಂಗೆಲ್ಲಾ

ಭಯ ಭಕ್ತಿಲ್ ಪೂಜಿತ್ ಪಾಡಿ

ಕೊಂಡಾಡನ ಬಾರಿ ಮಾಗುರು ಇಗ್ಗತ್ತಪ್ಪನ

|| ಬೋಡನ ಬಾರಿ ||

ಕುಂದ್‌ರಡಿಲ್ ನೆಲೆ ನಿಂದ ಇಗ್ಗತ್ತಪ್ಪ

ನಿನ್ನ ಬೋಡುವಕಾಯ್ ಜನ ಎಲ್ಲಾ ಬಪ್ಪ,

ನಂಗಳೆಲ್ಲಾ ಕಾಪಾಡುವ ಕರುಣಾಳ್ ನೀನಪ್ಪ

ಸದ್ಗುಣತ್ ಸನ್ಮಾರ್ಗತ್ ಬಾವ ಬಟ್ಟೆ ಕಾಟಪ್ಪ

|| ಬೋಡನ ಬಾರಿ ||

ಮನ ಮನತ್ತು ಮನೆ ಮಾಡ್‌ನ ಮಹದೇವನೆ,

ಗುಣಕೆಲ್ಲ ಗುರುವಾನ ಗುರುದೇವನೆ,

ಆಪ ಪೋಪಾನ ಅರಿಂಜ ಅಧಿದೇವನೆ,

ಕಾಂಗಂಡ್ಯಾನ ಕಾಟ್‌ನ ಕಾರಣನು ನೀನೆ

|| ಬೋಡನ ಬಾರಿ ||


ನೀಡ ಮಹಿಮೆಲಿಂದ್ ನಾಡ್‌ಕ್ ನಂದಾಡ್

ಮಳೆ ಬುದ್ಧಿತ್ ಅದಿಯಾಯ್ ಬೊಳೆಯಾಡ್,

ಸುಖ ಶಾಂತಿ ನೆಮ್ಮದಿ ಕರುಣಾಚಿಡ್ ಈಶ್ವರನೆ,

ನಿನ್ನ ನಂಬಿತ್ ನಂಗೆಲ್ಲಾ ಬಂದಿತ್ ಇಗ್ಗತ್ತಪ್ಪನೆ.

|| ಬೋಡನ ಬಾರಿ ||




## ಮುತ್ತ್ ಮಹಿಮೆ

ಮುತ್ತ್ ಮುತ್ತ್ ಮುತ್ತ್  
 ಇದ್‌ಂಡ ಮಹಿಮೆ  
 ಎಚ್ಚಕ್ ಜನಕ್ ಗೊತ್ತ್  
 ಮುತ್ತ್ ಎಣ್ಣೆವ ವಸ್ತು  
 ಎಚ್ಚಕೋ ತರತ್  
 ಬೆಚ್ಚಂಡಿತ್ ಆಂಡ ಗತ್ತ್  
 ಲೋಕತರ ಸುತ್ತ್ ಮುತ್ತ್  
 ಮಣಿಮಾಲೆ ಮಾಡುವಕ್,  
 ಸಮುದ್ರತರಡಿಲ್ ಕ್‌ಟ್ವಾವ ಮುತ್ತ್  
 ಚುಮ್ಮಿ ಕುಂಞಿನ ನೋಟ್‌ವಕ್,  
 ಕೊದ್‌ಚಿ ಕೊಡ್‌ಪ ಮುತ್ತ್  
 ಪ್ರೇಮಿಯ ಪಾರ್ಕ್, ಸಿನಿಮಾತ್,  
 ಕದ್ದಿತ್ ಕೊಡ್‌ಪ ಮುತ್ತ್  
 ವಡಿಯನು ಪೊಣ್ಣೊ ಪ್ರೀತಿಲ್  
 ಕೋಂಬರೆಲ್ ಕೊಡ್‌ಪ ಮುತ್ತ್,  
 ಅಪ್ಪ ಮೋವಕ್ ಪ್ರೀತಿಲ್  
 ಕೊದ್‌ಚಿತ್ ಕೊಡ್‌ಪ ಮುತ್ತ್,  
 ಅಪ್ಪ ಮೋವಂಗ್ ಕೊದ್‌ಚಿತ್




ಪ್ರೀತಿಲ್ ಕೊಡ್‌ಪ್ ಮುತ್ತ್,  
 ಅಜ್ಜನು ಅವ್ವಯ್ಯನು ಕೊಡ್‌ಪ  
 ಕೊರ್ ಮಕ್ಕಕ್ ಪ್ರೀತಿರ ಮುತ್ತ್,  
 ಇನ್ನನೆ ಉಂಡ್ ಮುತ್ತ್‌ರ ಮಹಿಮೆ,  
 ಮುತ್ತ್‌ನ ತಪ್ಪಿತ್ ಕೊಡ್‌ತಕ  
 ಉಂಡ್ ಆಪತ್ತ್...!



## ಪ್ರೇಮ ಸಂಗಮ

ಎಲ್ಲಿಯೋ ಪುಟ್ಟಿತ್  
 ಎಲ್ಲಿಕೋ ಒಕ್ಕಿತ್  
 ಪರಿವಂಜಿ, ರಾಗತ್  
 ಜುಳು ಜುಳ್‌ಂದ್  
 ಸದ್ ಮಾಡಿಯಂಡ್  
 ಆಡಿತ್, ಪಾಡಿತ್, ಕೂಡಿತ್  
 ಸಂಗಮ ಆನ  
 ಪೊಳೆರ ಪೋಲೆ  
 ನಾಡ ನೀಡ ಈ  
 ಪ್ರೇಮ ಸಂಗಮ!



## ಪೋರಾಟತರ ಬದ್‌ಕ್

**ಈ** ಲೋಕತ ಪೋರಾಟತರ

ಬದ್‌ಕ್ ಮೂಂದೇ ದಿನ

ನಾಡ, ತಾಂಡಾಂದೆಣ್ಣೆ

ಎನ್ನಂಗ್ ಸ್ವಾರ್ಥಕಾಯ್

ಪೋರಾಡುವೊ ಈ

ಬುದ್ಧಿ ಇಲ್ಲತ ಜನ?

ಈ ಲೋಕತ

ದಾರೂ ಶಾಶ್ವತ ಇಪ್ಪಾಲೆ

ಎಣ್ಣೆವದ್ ಇರಡ್ ಗ್ಯಾನ

ಎಲ್ಲರೂ ಈ ಲೋಕ ಬುಟ್ಟಿ

ಪೋಂಡು ಒರ್ ದಿನ


ಕೇಡ್, ಪಗೆ, ಕೇತರೆ ಮಾಡಿತ

ದ್ವೇಷತರ ಕಿಚ್ಚಲ್,

ಮಾಡಂಡ ಬದ್‌ಕ್‌ನ ಸ್ಮಶಾನ,

ಪಾಳ್ ಮಾಡಂಡ

ಅಂದೋಳತರ ಜೀವನ.



## ನಮನ

ಫೀಲ್ಡ್ ಮಾರ್ಷಲ್ ಕಾರ್ಯಪ್ಪಂಡ  
 ಪುಟ್ಕಾನಮೈಕ್ ಎದೆದುಂಬಾನ ನಮನ  
 ನಿಂಗಡ ಬಾಳ್ ಬದ್‌ಕ್ ಶಿಸ್ತ್ ಸಾಧನೆರ  
 ಬಟ್ಟೆ ಅಮರ ಆನ ಕಥೆನ ಎಳ್ವಾವಿ ನಾನ್ ಕವನ.  
 ಸ್ವತಂತ್ರ ಭಾರತತ್ ಮೂಪಡೆರ  
 ಆದ್ಯ ಜನರಲ್ ಆಯಿತಿಂಜಿರ  
 ಕೊಡಗ್ ಕೊಡವ ಜನಾಂಗತ್  
 ಕೇಳಿ ಕೀರ್ತಿನ ಈ ಲೋಕಕೇ ಸಾರಿರ.  
 ತಗ್ಗಿತ್ ಬಗ್ಗಿತ್ ಬೊತ್ತತೆ ಬೊರಾಂಡತೆ  
 ಬದ್‌ಕಾರ ಉದ್ದಕೂ ಬಾಳಿ ಬದ್‌ಕಿರ ಗತ್ತಲ್,  
 ನೀತಿ ನೇಮತ್ ಪ್ರೀತಿ ಪ್ರೇಮತ್  
 ನೇರೆ ನಿಷ್ಕುರತ್ ಧೈರ್ಯತ್ ನಡಂದಿರ ಶಿಸ್ತ್ಲ್.  
 ಧೈರ್ಯ ಸಾಸತ್ ಶಾಂತಿ ಸ್ನೇಹತ್,  
 ದೇಶ ದೇಶತ್ ನಡುಲ್ ಸಮ್ಮಂದತಾನ ಬೊಳ್‌ತಿರ,  
 ಕರ್ತವ್ಯ ನಿಷ್ಠೆಲ್ ಕಠಿಣ ಪರಿಸ್ಥಿತಿಲೂ

ನ್ಯಾಯ ನೀತಿಲ್ ಒಪ್ಪಂದ ಮಾಡಿರ.

ಶತ್ರುವಡ ಕೂಡೆ ಸಾಸ ಶೌರ್ಯತ್

ಪೋರಾಡಿತ್ ದೇಶತ್‌ನ ಕಾಪಾಡ್‌ನ ದೇಶಪ್ರೇಮಿ,

ಕೊಡಗ್‌ರ ಮೀದ ಆಸೆ ಅಕ್ಕರೆ,

ಪ್ರೀತಿ ಪ್ರೇಮ ಬೆಚ್ಚಂಡಿಂಜ ನಾಡ್ ಪ್ರೇಮಿ.

ಎಣ್ಣೆತಂದಿರ ಬಾಲೆಕಾರ ಬಂಬಂಗಕ್ ಶಿಸ್ತಾಗತ್

ಆಚಾರ ವಿಚಾರ ಪದ್ಧತಿ ಕೊಡವಾಮೆರ ದರ್ಶನ,

ಪ್ರತಿಯೋರ್ ಕೊಡವ ಕುಂಞಿಯಕ್ ಕಾಟಿ ಕೊಡ್ತಿರ,


ಬಾವಬಟ್ಟೆರ ನೀತಿ ನೇಮತ್‌ರ ಮಾರ್ಗದರ್ಶನ.

ಪುಟ್ಟ್ ನಮ್ಮೆರ ಶುಭ ಸಂದರ್ಭತ್,

ಸ್ವರ್ಗವಾಸಿಯಾನ ನಿಂಗಕ್ ಶುಭಾಶಯ ಬಯಂದವಿ,

ನಿಂಗಡ ಆಶೀರ್ವಾದ ಕೊಡಗ್ ಕೊಡವ


ಜನಾಂಗತ್‌ರ ಮೀದ ಎಕ್ಕಲೂ ಇರಂಡೂಂದ್ ಕೇಟವಿ.





## ಅವ್ವೊ

ಅವ್ವೊ ಎಣ್ಣಾವ  
 ದಂಡ್ ಅಕ್ಕರ  
 ಒರ್ ಅಮೂಲ್ಯವಾನ  
 ಅಪರೂಪತ್‌ರ ವಸ್ತು,  
 ತಾಂಡ ಸುಖತ್‌ನ ಮರಂದಿತ್,  
 ಕಷ್ಟತ್‌ನ ಸಹಿಸೀಯಂಡ್  
 ವಡಿಯಂಗ್ ಪೊಣ್ಣಾಯಿತ್  
 ಮಕ್ಕಕ್ ಅವ್ವನಾಯಿತ್  
 ಮಾಂವಿಯಾಯ್ ತಾಯಿಯಾಯ್  
 ತ್ಯಾಗ ಗುಣ ಮನತ್  
 ತೇಂಜಿ, ತೇಂಜಿತ್  
 ಬೋರೆಯಿಂಗ್‌ಕಾಯಿತ್  
 ಫಲತರತ್ ಪ್ರಯೋಜನ  
 ಆಪ ಅವ್ವಂಡ ಸ್ಥಾನ!  
 ಬೆಲೆ ಬಾಳ್ವ  
 ಒರ್ ಚಾಂದ್ ಮರ  
 ಅದ್ ಎಕ್ಕಲೂ ಅಮರ!



## ನಾ ಎನ್ನನೆ ವರ್ಣನೆ ಮಾಡಡ್

ಅಂದ್ ಕವಿ ಕತೆಗಾರ

ಕಲಾವಿದಂಗಕ್ ಸ್ಪೂರ್ತಿ

ಆಯಿತಿಂಜ ಪ್ರಕೃತಿರ ಚಾಯಿ

ಇಂದ್ ದುಷ್ಟ ಜನ ತಾಂಡ

ಸ್ವಾರ್ಥ ಸಾಧನೆನಗುಂಡ್ ಪಣತ್‌ರ

ಆಸೆಕ್ ಕಾಡ್‌ಗಳ್ಳುಂಗಳುಂಡ್

ಮರಕಾಡ್ ನಾಶ ಆಚಿ

ಕುಂದ್ ಬಾಣೆ ಬಾಣತ್‌ರ ಮಾದರಿ

ಬೆತ್ತಲಾಯಿತುಳ್ಳ ವನದೇವತೆನ

ನಾ ಎನ್ನನೆ ಕುಶೀಲ್ ವರ್ಣನೆ ಮಾಡಡ್?

ಆಡಿಯಂಡ್ ಪಾಡಿಯಂಡ್ ಜುಳು

ಜುಳೊಂದ್ ಜೋರಾತೆ ಸದ್ನ್ ಮಾಡಿಯಂಡ್


ಬೂವೊ ಅಬ್ಬಿ ಜಲಪಾತ, ಎಲ್ಲಡ

ಕಣ್ಣೊಮನತ್‌ನ ಸೂರೆ ಮಾಡುವ ದೃಶ್ಯ

ಎಲ್ಲಿ ನೋಟಾಚೆಂಗಿಯೂ ಪಚ್ಚೆ ಪಚ್ಚೆ

ರಂಗಾನ ಪೊಡಿಯ ಉಡ್‌ತಿತ್  
 ಚಿಂಗಾರ ಮಾಡಿತ್ ನಿಂದ ಭೂಮಾತೆ,  
 ಆಂಗಿ ಜೂಂಗಿತ್ ಕಳಿಪೆ ಬೊಳೆ ಬಾಳೆ,  
 ಕಾಫಿ, ಯಾಲ, ಕಣ್ಣ್ ಮನಕ್ ಆನಂದ ತಪ್ಪು  
 ಚಾಯುಳ್ಳ ದೃಶ್ಯ, ಇಂದ್ ಕಾಡ್ ಕೆತ್ತಿತ್,  
 ವನದೇವತೆನ ಬೆತ್ತಲೆ ಮಾಡಿತ್,  
 ಬೋಳ್ ಬೋಳ್ ಮಾಡ್‌ನ ಗೋಳ್‌ರ ಕಥೆನ  
 ನಾ ಎನ್ನನೆ ಸಂತೋಷತ್ ವರ್ಣನೆ ಮಾಡಡ್?  
 ದಕ್ಷಿಣ ಕಾಶ್ಮೀರ, ಸ್ಕಾಟ್‌ಲ್ಯಾಂಡ್‌ಂದ್  
 ಬಿರಂದ್ ಪಡಂದ್, ಪ್ರಕೃತಿ ಸೌಂದರ್ಯಕ್,  
 ನೆಲೆಯಾನ ಕೊಡಗ್ ನಾಡ್,  
 ಪರಮ ಪಾವನೆ, ಲೋಕಮಾತೆ,  
 ಕಾವೇರಿ ಪುಟ್ಟಾನ ಈ ಪುಣ್ಯನಾಡ್,  
 ಪರದೇಶಿಯಡ, ಪೊರ ರಾಜ್ಯಕಾರಡ  
 ಕೈವಾಡ ಕಾಡ್ !  
 ಕಾಲಕ್ ಸರಿಯಾಯಿ ಮಳೆ ಬೂವತೆ  
 ಪಡ್ಲೆ ಬೊಳೆ, ಪೂವ್ ಕಾಂಗತೆ,


ಬೊಳೆ ಸರಿಕ್ ಇಲ್ಲತೆ ಮೂಡ್‌ಸೀಮೆರ  
 ಮಾದ್ರಿ ಆಯಂಡುಳ್ಳ ಈ ಕೊಡಗ್‌ನ  
 ನಾ ಎನ್ನನೆ ಕಣ್ಣ್‌ದುಂಬ ನೋಟಿ ವರ್ಣನೆ ಮಾಡಡ್?  
 ಅಂದ್ ವನ ಸಿರಿಕ್, ಕಾಫಿ, ಯಾಲ  
 ಪುಳಿ, ನೆಲ್ಲಾ, ನಲ್ಲಮಳು, ಸಂಬಾರ ವಸ್ತುಕ್  
 ಲೋಕಕೇ ಕೇಳಿ ಪೋನ ಕೊಡಗ್,  
 ಇಂದ್ ತಾಂಡ ಪೆದ ಪೋನ ವಸ್ತುರ  
 ಬೆಲೆನ, ದಿನ ಪೋನನ್ನೇ ಕಳಂದಂಡುಂಡ್,  
 ಪಂಡೇತಾರ ಕೇಳಿ ನಲ್ಲಮೆನ  
 ಕವನ, ಕತೆ, ಪುಸ್ತಕತ್, ನಾಟಕತ್  
 ಪ್ರಕೃತಿ ಸೌಂದರ್ಯತ್‌ನ ಪೋಟೋತ್  
 ಕಲಾವಿದಂಗಡ ಚಿತ್ರತ್ ಮಾತ್ರ ನೋಟಿ  
 ಕುಷಿಪಡುವನ್ನೆ ಆಪಂತ ಸ್ಥಿತಿ  
 ಆನಂಗುಂಡ್ ಸ್ಫೂರ್ತಿ ಇಲ್ಲತ,  
 ನಾ ಎನ್ನನೆ ಪ್ರಕೃತಿ ಮಾತೆನ ವರ್ಣನೆ ಮಾಡಡ್?





## ಅಂದ್-ಇಂದ್

ಅಂದ್ ಅಂಬಲ  
 ಕೈಮಡ, ದೇವಸ್ಥಾನಾಂದ್  
 ಭಯ ಭಕ್ತಿಲ್,  
 ನಮ್ಮೆ ನಾಳ್‌ಕ್ ಬಂದಿತ್  
 ಕಾಳಿಕಮ್ಮೆ, ಕಾವೇರಮ್ಮೆ,  
 ಇಗ್ಗುತಪ್ಪ, ಗುರುಕಾರಣಾಂದ್  
 ಎಣ್ಣೆತ್, ಭಕ್ತಿಲ್ ತೊತ್ತಿತ್  
 ಅಡ್ಡ ಬೂವ ಇಂಜತ್  
 ಸಂಸ್ಕಾರ ಉಳ್ಳ ದೇವ ಭಕ್ತಂಗ;  
 ಇಂದ್ ಮಂದ್, ಮಾನಿ  
 ದೇವಸ್ಥಾನ, ನಮ್ಮೆ ನಾಳ್  
 ಮಂಗಲ, ಮುಂಜಿಲ್  
 ಇಸ್ಪೇಟ್ ಕಳಿ, ಕಳ್ಳ್ ಕುಡಿಕ್  
 ದಾಸಂಗಳಾಯ್  
 ಇಸ್ಪೇಟ್ ನಂಗಡ ಜೀವ  
 ಕಳ್ಳೇ ಎಂಗಡ ದೇವಂದ್  
 ಎಣ್ಣೆತ್ ಅದಂಗ್ ಅಡ್ಡ ಬೂವ  
 ಅಮುಲ್ ಪುಚ್ಚಿರ ಭಕ್ತಂಗ.



## ತೋರತ ಆಸೆ

ದೇವಯ್ಯಂಗ್ ದುಂಬಾ  
 ಓದುವ ಆಸೆ,  
 ದುಂಬಾ ಓದಿತಾನದು  
 ಬಲ್ಯ ಕೆಲಸತಾರ ಆಸೆ,  
 ಬಲ್ಯ ಕೆಲಸ ಕೊಟ್ಟಾನದು  
 ಅಧಿಕಾರತಾರ ಆಸೆ,  
 ಅಧಿಕಾರಿಯಾನದು,  
 ಕೈದುಂಬಾ ಸಂಬಳತಾರ ಆಸೆ,  
 ಕೈದುಂಬ ಸಂಬಳ ಕೊಟ್ಟಾನದು  
 ಗಿಂಬಳತಾರ ಆಸೆ,  
 ಗಿಂಬಳ ಕೊಟ್ಟಾನದು,  
 ಆಸ್ತಿ ಮಾಡುವೊ ಆಸೆ,  
 ಆಸ್ತಿ ಮಾಡಾನದು ಚಾಯಿಕರ್ತಿ  
 ಮೂಡಿನ ಮಂಗಲ ಕೈಪ ಆಸೆ,  
 ಮಂಗಲ ಕೈಪದಲ್ಲತೆ,  
 ಪೊಟ್ಟಿ ದುಂಬಾ ಡಾರಿರ ಆಸೆ,  
 ದುಂಬಾ ಡಾರಿ ಕೊಟ್ಟಾನದು  
 ಬಲ್ಯ ಬಂಗ್ಗೆ ಕೆಟ್ಟುವ ಆಸೆ,


ಬಂಗ್‌ಲೆ ಕೆಟ್ವನ ಪಿಂಞ  
 ಮಕ್ಕ ಮರಿಯಡ ಆಸೆ,  
 ಮಕ್ಕ ಆನದು ಅಯಿಂಗಳ  
 ದುಂಬಾ ಓದುಚಿಡುವೊ ಆಸೆ,  
 ದುಂಬಾ ಓದ್‌ಚಿಟ್ಟಿತಾನದು,  
 ಮಕ್ಕಡ ಭವಿಷ್ಯತ್‌ರ ಆಸೆ,  
 ಮಕ್ಕಕ್ ಕೆಲಸ ಕ್‌ಚಿಟ್ಟಿತಾನದು  
 ಮಕ್ಕಡ ಮಂಗಲ ಕೈಯಿಪ ಆಸೆ,  
 ಮಂಗಲ ಕೈಂಜ ಪಿಂಞ  
 ಮರಿ ಮಕ್ಕಡ ಆಸೆ,  
 ಎಲ್ಲಾ ಆಸೆ ತ್‌ಂದಿತಾನದು  
 ಕಾಯಿಲೆ ಕಸಾಲೆ ಇಲ್ಲತೆ  
 ಕಣ್ಣ್ ಮುಚ್ಚೊಂಡುಂದೆಣ್ಣ್‌ವೊ  
 ಒರೇ ಒರ್ ಆಕೀರಿ ಆಸೆ!  
 ಇನ್ನನೆ ತ್‌ರತ ಆಸೆ!



## ಅಭಿಮಾನ ಇರಂಡು


ಪ್ರೀತಿಚಿಡಂಡೂ  
 ಪ್ರೇಮಿಯ ದೇಶ ಪ್ರೇಮಿಯ  
 ಪವಿತ್ರ ಪ್ರೇಮತ್.  
 ದ್ವೇಷಿಚಿಡಂಡು  
 ದೇಶ ದ್ರೋಹಿಯಳ  
 ದುಷ್ಟ ಭ್ರಷ್ಟ ಜನಳ.  
 ನಾಶ ಮಾಡಂಡು  
 ಮೋಸ ಮಾಡುವ ಜನಳ,  
 ದೋಷ ಉಳ್ಳ ವಸ್ತುನ.  
 ಕಾಪಾಡಿಯಂಡ್ ಬರಂಡು  
 ಉಪಯುಕ್ತವಾನ ವಸ್ತುನ,  
 ಬದಕ್‌ಕ್ ಬೊಳ್ಳ ಕಾಟುವ ಪುಸ್ತಕತ್‌ನ.  
 ವಿಶ್ವಾಸ ಇರಂಡು  
 ಕಷ್ಟಕಾಲತ್ ನಂಬಿತ್,  
 ಸಹಾಯ ಮಾಡ್‌ನ ಜನಡ.  
 ದೂರ ಬೆಕ್ಕೊಂಡು  
 ನಂಬಿಕೆಕ್ ದ್ರೋಹ

ಮಾಡ್‌ನ ವಂಚಿಕೆಗಳ  
 ಧೈರ್ಯ ಸಾಸ ಪುರ್‌ಡ್ ಇರಂಡು  
 ನಾಡ್, ಭಾಷೆ, ಕೊಡವಾಮೆರ  
 ಬೊಳಚೆಕ್ ಪೋರಾಡುವ ಶಕ್ತಿ.  
 ಪ್ರಾಣತನ ತ್ಯಾಗ ಮಾಡಂಡು  
 ಕೊಡಗ್‌ರ ಜನಡ, ಆಸ್ತಿ-ಪಾಸ್ತಿ  
 ಮಾನ-ಪ್ರಾಣ ರಕ್ಷಣೆಕಾಯಿತ್  
 ಅಭಿಮಾನ ಇರಂಡು  
 ಕೊಡವ ಭಾಷೆರ ಮೇಲೆ,  
 ಕೊಡವ ಪುಸ್ತಕ ಪತ್ರಿಕೆರ ಮೇಲೆ.  
 ಮೋಹ ಇರಂಡು ಕೊಡವ  
 ಭಾಷೆರ ಮೇಲೆ, ವ್ಯಾಮೋಹ  
 ಇಪ್ಪಕಾಗ ಪೊರ ಭಾಷೆರ ಮೇಲೆ.  
 ಅಭ್ಯಾಸ ಇರಂಡು ಕೊಡವಡ  
 ನಲ್ಲ ಎಳ್ತ, ಸಾಹಿತ್ಯ, ಕವನ  
 ಓದ್‌ವೊ ಆಸಕ್ತಿ ಇರಂಡು.



## ಪೂವು-ತುಂಬ

ನಿಲ್ಲ ನಿಲ್ಲ ನಿಲ್ಲ  
 ನಾಡ ಮಲ್ಲಿಗೆ ಮೂಡಿ  
 ನೀನ್ ಪೋಪೊ ಎಲ್ಲಿಕ್  
 ನಾನೂ ಬಪ್ಪಿ ಅಲ್ಲಿಕ್  
 ನೀಡ ಮನಸ್ಸು ನಾಕ್ ಗೊತ್ತ  
 ನಾಡ ಮನಸ್ಸು ನೀಕ್ ಗೊತ್ತ  
 ಇಂಞೂ ಎನ್ನಂಗ್ ನೀಡ ಗತ್ತ  
 ನಂಗಡ ಪ್ರೀತಿ-ಪ್ರೇಮ ಎಲ್ಲಾಕು ಗೊತ್ತ!  
 ನೀಡ ಕಣ್ಣು ತಾವರೆ ಪೂವ್  
 ನೀಡ ಮೂಕ್ ಚಿಪ್ಪೆ ಪೂವ್  
 ನೀಡ ದವಡೆ ಗುಲಾಬಿ ಪೂವ್  
 ನೀಡ ಪಲ್ಲ ಮಲ್ಲಿಗೆ ಪೂವ್  
 ನೀನೋರ್ ಬೀಂದ ಪೂವ್  
 ನಾನೋರ್ ನೀಡ ತುಂಬಿ  
 ನೀಡಲ್ಲಿ ಉಂಡ್ ಮಕರಂದ  
 ಅದ್‌ನ ಉತುವಕ್ ನಾಕಾನಂದ  
 ನೀನ್ ಪೊಂದೊಳಿ ತೆಳುಚಿತ್  
 ನಾಕ್ ಮಾಡಿಯ ಮೋಡಿ,  
 ನೀನೇ ನಾಕ್ ನಲ್ಲ ಜೋಡಿ  
 ನಂಗಕಿಲ್ಲೆ ದಾಡ ಪೋಡಿ !



## ನೋಟಿ ಬಾರಿ ಒಮ್ಮೆ

ನೋಟಿ ಬಾರಿ ಒಮ್ಮೆ ಕಣ್ಣ್ ದುಂಬ

ಪ್ರಕೃತಿರ ಮಡಲ್ ನೆಲೆ ನಿಂದ

ದಕ್ಷಿಣ ಕಾಶಿ ಧರ್ಮಸ್ಥಳ

ದಾನ ಧರ್ಮ ಮಾಡುವ ಪುಣ್ಯಸ್ಥಳ

ಭಯಭಕ್ತಿಲ್ ಸ್ವಾಮಿರ ಸನ್ನಿಧಿಕ್ ಪೋಕನ

ಶ್ರೀ ಮಂಜುನಾಥ ದೇವಸ್ಥಾನ ನೋಟಿನ,

ಪಾಪ ನಾಶಿನಿ ನೇತ್ರಾವತಿಲ್ ಕುಳಿಕನ

ಮಾಡ್ನ ಪಾಪ ಕರ್ಮತ್ನ ತೋಕನ.

ತಪ್ಪ್ ಕಾಣಿಕೆ ಪರಕೆನ ಒಪ್ಪ್ಪಿಚಿಡನ

ನಲ್ಲ ಮನಸ್ಸಲ್ ಮಂಜುನಾಥ ಸ್ವಾಮಿನ ಪೂಜನ

ವಕ್ಕ, ಮಕ್ಕಕೆಲ್ಲಾಕು ನಲ್ಲದಾಡ್ಂದೇ ಬೋಡನ,

ಸತ್ಯ ಧರ್ಮತ್ ನ್ಯಾಯ ನೀತಿಲ್ ಬಾವನ.

ಎಲ್ಲ ಮತ, ಜಾತಿ, ಧರ್ಮಕಾರ ಒತ್ತೋರ್ಮಲ್ ಕೂಡುವ ಇಲ್ಲಿ

ಭಕ್ತಂಗಡ ಮನಸ್ಸಕ್ ಶಾಂತಿ ನೆಮ್ಮದಿ ಕಾಟ್ವವ ಅಲ್ಲಿ

ತಪ್ಪ್ ನೆಪ್ಪ್ನ ಒಪ್ಪ್ಪ್ ಮಾಡ್ವ ಮಂಜುನಾಥಂಡ ನ್ಯಾಯಾಲಯ,


ಕೆಲಪ್ಪೆಚಿತ್ ಬಂದ ಜನಕ್ ಇಡ್ವ ಕೂಳ್ ಬ್ರಹ್ಮಂಡ ದೇವಾಲಯ.

ಪೊಟ್ಟ್ ಮೋಸಕ್, ಕಳ್ಳತನಕ್ ಇಲ್ಲಿ ಇಲ್ಲೆ ಜಾಗ,

ದೇವಡ ಸನ್ನಿಧಿಲ್ ದಾರ್ಕೂ ಅನ್ಯಾಯ ಮಾಡುವಕಾಗ

ನಾಡ್ಕ್ ನಲ್ಲದಾಡ್ಂದ್ ದೇವಳ ಬೋಡ್ಯವನ,


ಧರ್ಮಸ್ಥಳತರ ಮಹಿಮೆನ ಲೋಕಕ್ ಕೊಂಡಾಡನ.



## ಮೂಡಿರ ಪ್ರಾರ್ಥನೆ

ಓ ದೇವ ನಾಕ್  
 ತೋಟ, ತೋಡಿಯ,  
 ಬಂಗಲೆ, ಮನೆಲ್  
 ಬೊಳ್ಳಿರ ಬಟ್ಟಿ  
 ಬೊಳ್ಳಿರ ತಟ್ಟೆಲ್  
 ಕೂಳ್ ಇಡುವಂಜಿ  
 ಪೊನ್ನಾರ ಪಂಜರತ್  
 ಕೂಟಿತ್ ನೋಟಿಯವ  
 ವಡಿಯ ಬೋಂಡ.


ಚುಮ್ಮಿ ಮನೆಲ್  
 ಕಂಜಿ ಕುಡಚಂಡಾಚೆಂಗಿಯೂ  
 ಬಲ್ಯ ಮನಸ್ಸಾರ  
 ನಲ್ಲ ಹೃದಯವುಳ್ಳ  
 ಒತ್ತೋರ್ಮೆಲ್ ಬಾವನ್ನತ  
 ವಡಿಯನ ತಾ ಮಾತಾಯಿ.





## ಗೇನ

ಅಕ್ಕ ಅನ್ನನೆ  
 ಆಕಲು ಇಂಜತ್,  
 ಇಕ್ಕ ಇನ್ನನೆ  
 ಇರೋಲಿಂಜತ್ ಎಣ್ಣೆತ್  
 ಆಯಿಪೋನಾನ  
 ಗೇನ ಮಾಡುವದ್  
 ಭೂತ ಕಾಲತ್‌ರ  
 ವ್ಯರ್ಥ್ ಫಲ,  
 ಮಿಂಞಾಕ್ ಆಪಕುಳ್ಳಾನ  
 ಗೇನ ಮಾಡುವಂಜಿ  
 ಸಾಧನೆ ಮಾಡಿತ್  
 ಸಾದ್ ಚಿಡುವದ್  
 ಭವಿಷ್ಯತ್ ಕಾಲತ್  
 ಕ್‌ಟ್ವೊ ಪ್ರತಿಫಲ.



## ಚೆಂಡೋಟ್ ಕಳಿ

ಕಳಿ ಕಳಿ ಬೀರ ಕಳಿ, ಶೂರ ಕಳಿ, ಹಾಕಿಕಳಿ.

ಕೊಡವ ಬಂಬಂಗಡ ಚೆಂಡೋಟ್ ಕಳಿ

ಕೂಟ್‌ಕಾರಡ ಕೂಟತ್ ಒತ್ತೋಮೆರ ಕಳಿ

ನೋಟುವ ಜನಕ್ ಪುರಡ್ ಕೂಟುವ ಕಳಿ.

ಚೆಂಡೋಟ್ ಕಳಿ ಕೊಡವ ಬಂಬಂಗಕ್ಕೆಲ್ಲಾ ಗೊತ್ತ್

ಕಳಿಲ್ ಬೋಂಡು ಕಳಿಕಾರಂಗಕ್ ಶಿಸ್ತ್,

ಪ್ರತಿಯೊಬ್ಬನೂ ಬೆಚ್ಚವಂಡು ಅವಂಡ ಗತ್ತ್,

ಕಳಿಲಿರಂಡು ನಿಯತ್ತ್ ಗೆಲ್ಲಾವಕ್ ಅದೇ ಬರ್ಕತ್ತ್.

ಚೆಂಡ್‌ರ ಮೇಲೆ ನಿಗ ಇರಂಡು

ತಂಡ್‌ರ ಮೀದ ಪುಡ್‌ತ ಬೋಂಡು,

ಮಂಡೆಲುಳ್ಳ ಬುದ್ಧಿ ಚುರ್‌ಕ್ ಅಂಡು,

ಗೆಲ್ಲಾವ ಶಕ್ತಿ ನಿಪ್ಪುಲ್ ಕಾಂಗಂಡು.

ನೀತಿ ನಿಯಮ ಕಳಿಲ್ ಇರಡ್,


ಗೆಲ್ಲಾವ ಪುರಡ್ ಕಳಿಲ್ ಕಾಂಗಡ್,

ಚೋಪೊ ಗೆಲ್ಲಾವದ್ ಒಂದಾಯ್ತ್ ಇರಡ್

ಕಿಚ್ಚ್ ಕೇಡ್ ಕೇತರೆ ದೂರ ಪೋಡ್.


ಪ್ರೀತಿ, ಸ್ನೇಹ, ಸೌಖ್ಯ ಈ ಕಳಿಲ್ ಇಪ್ಪು,

ಒಕ್ಕ ಒತ್ತೋಮ್ ಇದತ್ ಬಪ್ಪ,  
 ನಾಡಾರ ಕೇಳಿ ಪಬ್ಬಿತ್ ಇಪ್ಪ,  
 ದೇಶಕ್ ಕಳಿಕಾರಳ ತಯಾರ್ ಮಾಡಿತಪ್ಪ,  
 ಚಿಂಡೋಟ್‌ರನ್ನನೇ ನಂಗಡದೂ ಒರ್ ಬದ್‌ಕ್,  
 ಪ್ರಯತ್ನ ಪಡಂಡು ಜಯತ್‌ರ ಗೋಲ್ ಇಡ್‌ವಕ್,  
 ಪ್ರತಿ ಗಳಿಗೆಯೂ ಪೋರಾಡಂಡು ಜೀವನತ್ ಗೆಲ್‌ವಕ್,  
 ಪ್ರತಿ ಫಲ ಕೆಟ್ಟಾವ ನಂಗಡ ಸಾಧನೆಕ್.



## ಎಂತ ಫಲ?

ಅಮ್ಮಾ ತಾಯಿ ಕವಳಾಂದ್  
 ಎಣ್ಣೆತ್ ಭಿಕ್ಷೆಕಾರ ಬಾತೇಂಗಿ  
 ಎಂಜಿ ಕೈನ ನಕ್ಕುವಂಜಿ  
 ದೌತುವ ಜನ  
 ದೇವಸ್ಥಾನ, ಉಪವಾಸ  
 ಯಾತ್ರೆ, ಪೂಜೆ, ಪುರಸ್ಕಾರ,  
 ಕಾಣಿಕೆ ಇಟ್ಟಕ ಎಂತ ಫಲ?  
 ನಾಯಿ ಕತ್ತೆಯಡ ಮೊಲೆಲ್  
 ಪಾಲ್ ಇಂಜಕ ಎಂತ ಫಲ?



## ಕಾಡ್‌ರ ಪಾಡ್

ಕಾಡ್‌ನ ಕೆತ್ತಿತ್

ಮಾಡ್‌ಚಿ ನಾಶ

ನಾಡ್‌ರ ಜನ ನಿರ್ದಯತ್!

ಪುಳ್ಳಿಕ್, ಮನೆಕೆಟ್ಟುವಕ್

ಮನೆ ಮುಟ್ಟ್ ಮಾಡ್‌ವಕ್

ಕಾಡ್‌ನ ಕೆತ್ತ್‌ಚಿ ನಿರ್ದಯತ್

ತರ ತರತ್‌ರ ಮಕ್ಕಡ

ತರಾವರಿ ಕಳಿಪ ಸಾಮಾನ್‌ಕ್

ಬೂಕ್‌ಚಿ ಮರತ್‌ನ ನಿರ್ದಯತ್!

ಮೂಕ ಪಕ್ಷಿಯಕ್ ವಾಸಕ್

ನೆಲೆ ಕೊಡ್‌ಮರತ್‌ನ

ಕೆತ್ತಿತ್ ಕೊಂದತ್ ನಿರ್ದಯತ್!


ಬೆದ್ ಉರಿಲ್ ಬಟ್ಟೆಲ್ ಪೋಪ

ಜನಕ್, ರೈತಂಗಡ ಆಯಾಸಕ್ ತಣ್‌ಪು

ಆಯಿತಿಂಜ ಮರತ್‌ನ ಬೂಕ್‌ಚಿ ನಿರ್ದಯತ್!


ಬೂಟಿ, ತೇಗ, ಚಾಂದ್

ಮರತ್‌ನ ಪಣತ್‌ರ ಆಸೆಕ್  
 ಕೆತ್ತಿತ್ ಮಾರ್‌ಚಿ ನಿರ್ದಯತ್!  
 ನೆಲ್ಲ, ಕಾಫಿ, ಏಲಕ್ಕಿ, ಪುಳಿ  
 ಚಕ್ಕೆ, ಮಾಂಗೆರ ಫಸಲ್ ಕಮ್ಮಿ ಆಚಿ  
 ಮಳೆ ಇಲ್ಲತೆ ಕಾಡ್‌ನ ಕೆತ್ತಿತ್ ನಿರ್ದಯತ್!  
 ಪಾಲ್ ತಪ್ಪ ಪಯ್ಯುನ ಕೊಂದನ್ನನೆ  
 ಬಾಳಾಕ್ ಉಸರಾನ ಮರತ್‌ನ ಕೆತ್ತಿತ್  
 ನಾಶ ಮಾಡ್‌ಚಿ ಮೂರ್ಖಿಂಗ ನಿರ್ದಯತ್!



## ಎಚ್ಚರ !

ಕುಡಿಪಕಾಗ ಕಳ್ಳೆ ಜಾಸ್ತಿ,  
 ಪಾಳಾಪ ತಡಿ-ಅಸ್ತಿ,  
 ಪಣಕಾಸಾಕ್ ಮಾಡುವ ಕುಸ್ತಿ  
 ಕೋರ್ಟ್, ಕಛೇರಿ ಪತ್ತುವ ವ್ಯಕ್ತಿ?  
 ಮಾನ ಮರ್ಯಾದಿ ಪೋಪ ಪೂರ್ತಿ.



## ಬೋಂಡಿಯಾಯಿತ್ !

ಕೊಡವ ತಕ್ಕ್ ಬಾಕ್, ನಡ್‌ಪ್

ಉಡ್‌ಪ್, ಆಯಿಮೆ ಕೋಯಿಮೆನ

ಚಾಯೋಡೆ ಗೊತ್ತುಳ್ಳವು ಬೋಂಡಿಯಾಯಿತ್

ಕೊಡಗ್‌ರ ಊರ್ ಕೇರಿ, ನಾಡ್‌ರ ವಿಷಯ

ಪೊಳೆ, ಕೆರೆ, ಮಂದ್, ಮಾನಿ ಹದ್ದೆರ ವಿಷಯ

ಸರಿಕ್ ಅರಿಂಜಂವೊ ನಂಗಕ್ ಬೋಂಡಿಯಾಯಿತ್

ಕೊಡಗ್‌ರ ಕಾವೇರಮ್ಮೆ, ಇಗ್ಗುತಪ್ಪಂಡ ನೆಲೆರ ಮೇಲೆ ಭಕ್ತಿ,

ಕೊಡವ ಸಂಘ ಸಂಸ್ಥೆ, ಕೊಡವ ಪತ್ರಿಕೆರ

ಮೇಲೆ ಅಭಿಮಾನ ಉಳ್ಳವು ಬೋಂಡಿಯಾಯಿತ್

ಕೊಡವಡ ಆಟ್‌ಪಾಟ್, ಮಂಗಲ ಮುಂಜಿ,

ಮಾದ, ನಮ್ಮೆ ನಾಳ್‌ರ ಪದ್ಧತಿನ

ಚಾಯೋಡೆ ಗೊತ್ತುಳ್ಳವು ಬೋಂಡಿಯಾಯಿತ್

ಕೊಡಗ್‌ಕಾಯ್ ಕೊಡವ ಜನಳ

ಮಿಂಞಾಕ್ ಕೊಂಡ ಬಪ್ಪಕಾಯ್


ಪೋರಾಡುವಯಿಂಗ ಬೋಂಡಿಯಾಯಿತ್

ಇಂದ್ ಅವಶ್ಯವಾಯ್ ಬೋಂಡಿಯಾಯಿತ್

ಕೊಡವಡ ಆಸ್ತಿ, ಪಾಸ್ತಿ, ಮಾನ, ಪ್ರಾಣಿಕ್


ತೊಂದರೆ ಮಾಡ್‌ವಯಿನ ಧ್ವಂಸ

ಮಾಡುವವು ಬೋಂಡಿಯಾಯ್ತ್  
 ಕೊಡಗ್‌ಕಾಯ್ತ್ ಮನ, ಪಣ, ಪ್ರಾಣ  
 ಕೊಡ್‌ಪವು, ನಾಡ್‌ಕಾಯ್ತ್ ನೈಪಯಿಂಗ  
 ನೇರಾಯ್ತ್ ಇಂದ್ ಬೋಂಡಿಯಾಯಿತ್  
 ಸತ್ಯವಂತಂಗ, ನ್ಯಾಯವಂತಂಗ  
 ತ್ಯಾಗ ಜೀವಿಯ, ನಂಗಡ ಕೊಡವ  
 ಅಭಿಮಾನಿಯಡ ಸಂಘಕ್ ಅವಶ್ಯ ಬೋಂಡಿಯಾಯಿತ್



## ಮೌನಕಾರ

ಕತೆಕಾರಂಗ ಕವಿಯ  
 ಎಕ್ಕಲೂ ಮೌನಿಯ  
 ಅಯಿಂಡ ಎಳ್ಲ್‌ಲ್  
 ಜನಳ ಸೃಷ್ಟಿ ಮಾಡಿತ್  
 ಅಯಿಂಗಳುಂಡ್  
 ಬೋಂಡ್ಯಚ್ಚಕ್ ತಕ್ಕ  
 ಬಾಕ್ ಪರಿಚಿಡುವ.




## ಪ್ರೀತಿರ ಬೆಲೆ

ಪ್ರೀತಿ ಎಣ್ಣೆವದ್ ಚತ್ತಲ್  
 ಮಾರಾಟ ಮಾಡುವ ಉಪ್ಪು  
 ಮಳು, ಸಂಬಾರ, ತರಕಾರಿ  
 ವಸ್ತುರ ಮಾದರಿ ಅಲ್ಲ  
 ಪ್ರೀತಿಕ್ ಒರ್ ರೀತಿ ನೀತಿ ಉಂಡ್  
 ಪ್ರೀತಿ ಎಣ್ಣೆವದ್ ಪವಿತ್ರವಾನ  
 ಬೆಲೆಕಟ್ಟತಂತ ಅಮೂಲ್ಯ ವಸ್ತು  
 ಪ್ರೀತಿ ಎಣ್ಣೆವಾನ, ತೂಕಿತ್  
 ಗುಡ್ಡೆ ಇಡುವಕ್ ಕಯ್ಯುಲೆ  
 ಗುಡ್ಡೆ ಇಟ್ಟಿತ್ ಮಾರುವಕಯ್ಯುಲೆ  
 ಪ್ರೀತಿ ಎಣ್ಣೆವದ್ ಒತ್ತೋರ್ಮೆಲ್  
 ಹೃದಯ ಹೃದಯತ್‌ನ ಅರ್ಥ  
 ಮಾಡ್ಯಂಡ್, ಕಷ್ಟ ಸುಖಕ್  
 ಕೂಡಿಯಾಡುವ ಮನತಾರ  
 ಆಳತ್ ಪದಂಗಿತಿವ್ವ ವಸ್ತು




ಪ್ರೀತಿನ ಆಸ್ತಿ, ಪಣ, ಅಧಿಕಾರ  
 ಅಂತಸ್ತ ಉಂಡೇಂಗಿ ಮಾತ್ರ  
 ಬೆಲೆ ಕೆಟ್ಟವಂತ ಕಾಮುಕಂಗಡ  
 ಭೋಗತಾರ ವಸ್ತು ಅಲ್ಲ.  
 ಪ್ರೀತಿ ಎಣ್ಣಾವದ್ ಪಾಲಾ  
 ತೇನಾರ ಮಾದ್ರಿ ಪವಿತ್ರ  
 ವಜ್ರ ವೈಢೂರೈತಾರಂತ  
 ಬೆಲೆ ಬಾಳುವ ವಸ್ತು.



## ಪೊನ್ನಾಕ್ಕ

ಬೊಳಪು ನೀರೆಲ್ಲಾ ಪಾಲಲ್ಲ  
 ಮಿನ್ನಾವದೆಲ್ಲಾ ಪೊನ್ನಲ್ಲ  
 ಪರೆವದೆಲ್ಲಾ ತಕ್ಕಲ್ಲ  
 ಎಳಾದುವದೆಲ್ಲಾ ಸಾಹಿತ್ಯ  
 ಅಲ್ಲೇ ಅಲ್ಲ..... !



## ಕೆಟ್ಟನ ಕೂಪದಿ

ಅಪ್ಪ ಅಪ್ಪೋ ದೇವಡ

ಮೇಲೆ ಅಣೆ ಇಟ್ಟಾ

ಮುಂಡತೆ ಮುಂಡತೆ

ಸ್ವಂತ ಪ್ರಯತ್ನತ್,

ಮೋಳೆಕೇರನವಂಡ ಮೇಲೆ

ಕಣ್ಣುರಿ ಕೆಲವುರಿಲ್

ಇಲ್ಲತ ಬಲ್ಲಾದೆ

ಕೇತರೆ ಮಾಡುವಂಜಿ


ಪರಿವಕಾಗ ಚದಿ ಪೊಟ್ಟಾ

ಅಕ್ಕ ದೇವನೊಬ್ಬ

ನೋಟ್ಟಿವ ಅವನ


ಅದ್ ಅವಂಗದ್

ಕೆಟ್ಟನ ಕೂಪದಿ ಕೆಟ್ಟಾ!




## ನಂಗಡ ಬದ್‌ಕ್

ನಂಗಡ ಬಾಳ್-ಬದ್‌ಕ್  
 ಬದ್‌ಕ್ ಬಾಳೆಪಣ್ಣಲ್ಲ,  
 ಬಲ್ಯೋರ್ ಚಕ್ಕೆ ಪಣ್ಣ್.  
 ಈ ಲೋಕತ್ ಮೂಂದ್  
 ದಿನ ಬಾವಕುಳ್ಳಾಂಗ್  
 ಏರ ಎಚ್ಚರ, ತಾಳ್ತೆ  
 ಸಮಾಧಾನ ಬೋಂಡು.  
 ಬದ್‌ಕ್ ಎಣ್ಣುವ  
 ಚಕ್ಕೆ ಪಣ್ಣ್‌ನ ತಾಳ್ತೆಲ್ ಬುಡ್‌ತಿತ್  
 ಸಮಸ್ಯೆ ಎಣ್ಣುವ  
 ಸಂಸಾರತ್‌ರ ಮಳ್‌ಂಜಿಕ್  
 ಪರಿಹಾರ ಎಣ್ಣುವ  
 ಎಣ್ಣೆನ ಕೈಕ್ ಉದ್ದಿತ್  
 ಸಮಾಧಾನ ಎಣ್ಣುವ  
 ಪೀಲಿನ ನಿಧಾನತ್ ಬುಡ್‌ತಿತ್  
 ಪ್ರತಿಫಲ ಎಣ್ಣುವ  
 ಪಣ್ಣ್‌ನ ತೃಪ್ತಿಲ್  
 ತಿಂದಿತ್ ತೋಪದೇ  
 ನಂಗಡ ಬದ್‌ಕ್.



## ಪಾಲೆ

ಒರ್ ಅವ್ವಂಡ ಮೊಲೆ ಪಾಲೆನ  
 ಸಮಪಾಲೆ ಕುಡಿಪಂಜಿ  
 ಬೊಳಂದ ಮಕ್ಕ,  
 ಆಸ್ತಿಪಾಲೆರ ವಿಷಯತ್  
 ವ್ಯಾಜ್ಯ ಮಾಡುವಂಜಿ  
 ದಾಯಾದಿಯಳಾಯಿತ್ ದೂರಾಚಿ,  
 ಕೊಲ್ಲ್ ಕೊಲೆಲ್  
 ಕೋರ್ತ ಕಛೇರಿ ಪತ್ತುವಂಜಿ,  
 ಪಣ, ಆಸ್ತಿ, ನೆಮ್ಮದಿ ಪಾಳಾಚಿ.  
 ಅಯಿಂಡ ಬದ್ಕ್ ಬೀದಿ ಪಾಲಾಚಿ  
 ಬದ್ಕೆಲ್ಲಾ ಬೊರೀ ಗೋಳಾಚಿ.



## ಕಾಲ ದುಂಬ ಪಾಳ್

ಕಾಲ ದುಂಬ ಪಾಳ್

ಇಡಂಡ ಮೋಳೆ

ಮೇಲ್ ದುಂಬಾ

ಪೊನ್ನಾರ ಮಾಲ್;

ಕಳ್ಳ ಪೆರಪಣಂಗಡ

ಕೆಟ್ಟಿ ಕಣ್ಣ್ ಬೂವ

ನೀಡ ಮೇಲೆ;

ಎಣ್ಣೆವ ಕಯ್ಯುಲೆ


ಪೋಲಿ ಪೊರ್ಕಿಯಡ ಚಾಲ್;

ದುಂಬಾ ಚಿಂಗಾರ

ಇಟ್ತ್ ಮೆರಂದಕ

ಆಪ ಮಾಲ್


ಕಳ್ಳಂಗಡ ಪಾಲ್!



## ಎಂತ ಉಂಡೇಂಗೆನ್ನ್

ತೆಳ್ಳೆಂಗ್‌ನ ಮನಸ್ಸೆಲ್  
 ಪೊಂದೆಳಿರ ಪ್ರೀತಿ ಇಲ್ಲತ ಪಿಂಞ  
 ಮಾಯಕಳಿರ ಸ್ನೇಹ ಎನ್ನ್‌ಂಗ್?  
 ಮಂಜಣೆ ಕಳಿರ  
 ತಕ್ಕ ತೆಳಿ ಎನ್ನ್‌ಂಗ್?  
 ಹೃದಯ ಎಣ್ಣೆವ  
 ಪೂ ತೋಟತ್ ಮಮತೆ ಎಣ್ಣೆವ  
 ಪೂ ಬೀರತ ಪಿಂಞ  
 ನೀರ್ ಬೂಕ್‌ವೊ ಎನ್ನೆಂಗ್?  
 ಅದ್‌ಂಗ್ ಚಿಂಗಾರ ಎನ್ನ್‌ಂಗ್?  
 ನಲ್ಲ ಬುದ್ಧಿ, ಗುಣ  
 ನಡತೆ ಇಲ್ಲತ ಪಿಂಞ  
 ಆ ಪೊಣ್ಣೆಕ್ ಚಾಯಿ ಬೋಜ  
 ಅಲಂಕಾರ ಎನ್ನ್‌ಂಗ್?  
 ಮೇಲ್ ದುಂಬ್ ಚಿಂಗಾರ ಎನ್ನ್‌ಂಗ್?

ಎದೆರೊಳೆಲ್ ನಲ್ಲ ಮನಸ್ಸು  
 ಇಲ್ಲತ ಪಿಂಞ ಆ ಮನೆಲ್  
 ನೈಕೊಳ್, ಪಲಾವಾರಂತ  
 ಗದ್ದಳತಾರ ಊಟ ಉಂಬೊ ಎನ್ನಂಗ್?  
 ಗೌಜಿರ ತಿಂಡಿ ತಿನಿ ತಿಂಬೊ ಎನ್ನಂಗ್?  
 ಕೊಡುಗೈ ಮನಸ್ಸು ಇಲ್ಲತ ಪಿಂಞ  
 ಕೋಟಿಗಟ್ಟಲೆ ಕೂಟಿ ಬೆಚ್ಚ  
 ಪಣ ಆಸ್ತಿ ಸಂಪಾದನೆ ಎನ್ನಂಗ್?  
 ಬೆಂದು ಚಂಜಾದಿ, ಸಾಲ್ ಸಂತಾನ  
 ಬರತ ಪಿಂಞ ಅಂಥ ಬರಡ್ ಬಾಳ್ ಎನ್ನಂಗ್?  
 ಏದೂ ಶಾಶ್ವತ ಅಲ್ಲತ ಪಿಂಞ  
 ಮಣ್ಣೆಲ್ ಮಣ್ಣಾಯಿ ಪೋಪ ಈ ತಡಿಕ್  
 ಪಣ, ಆಸ್ತಿ, ಗತ್, ಬಲ್ಯರಿಕೆ ಎನ್ನಂಗ್?  
 ತಿತ್ತೇಂದ್ ಕಂಡತೇಂಗಿಯೂ ನೆಪ್ಪಾತೆರನ್ನಕೆ  
 ಜನ ಗೊತ್ತಿಂಜಿತೂ ತಪ್ಪ್ ಮಾಡುವೊ ಎನ್ನಂಗ್?



## ತುಳಿ ಕವನ

ತುಳಿ ಕವನ

ತೇನ್ ತಿಂದ

ತೋಳಿ ಮೂಡಾರ ಮಾದಾರಿ ಚಾಯಿ

ತುಳಿ ಕವನ

ಸುರು ಸುರುಲ್

ಕೂಡಾವ ಪ್ರೇಮಿರ

ತೋಳಿರ ಮಾದಾರಿ ಚಾಯಿ


ತುಳಿ ಕವನ

ಚುಮ್ಮಿ ಕುಂಞಾರ

ತೆಳಿ ಮೂಡಾರ ಮಾದಾರಿ

ಚಾಯಿ ಚಂದ ಪೆರ್ತ್

ಅರ್ಥ ಉಳ್ಳಂತದ್.



## ಆಸ್ತಿ

ಕವಿರ ಬದಾಕ್‌ಲ್ ಸುಖಿಕಿಂಜಿ

ಕಷ್ಟ ದುಃಖವೇ ಜಾಸ್ತಿ

ಕವಿತೆರ ಬೊಳಚೆಕ್

ಅದೇ ಅವಂಡ ಬಲ್ಯ ಆಸ್ತಿ.



## ನಂಗಡ ಸ್ವಂತ ವಿದ್

ನಂಗಡ ಸ್ವಂತಾಂದ್  
 ವಿದ್ ಉಂಡ್ ಈ ಜಗತ್  
 ಪುಟ್ವಕ ಬಾತ್ ಬೆತ್ತಲೆ  
 ಪೋಪಕೊ ಅನ್ನನೆ ಬೆತ್ತಲೆ  
 ಇಪ್ಪಕ ಎಲ್ಲಾರೂ ಕೂಡೆ ಬಪ್ಪ  
 ಪೋಪಕ ದಾರೂ ಬಪ್ಪಲೆ,  
 ನಂಗಡ, ನಂಗಡಾಂದ್  
 ಪೋರಾಡುವೊ ಎನ್ನಂಗ್?  
 ಕೋಟಿ ಕೋಟಿ ಕೋಟಿ  
 ಬೆಪ್ಪ ಆಸ್ತಿ ದಾರ್ಕ್?  
 ನಂಗಡ ದಾನ ಧರ್ಮ ನಲ್ಲರಿಕೆ,  
 ಅದೇ ನಂಗಡ ಶಾಶ್ವತ ಆಸ್ತಿ.



## ಕೆಮಿ ತಕ್ಕ್

ಎರ ಕಳ್ಳ, ಕುಡಿಕತಿ ಬಾವ,  
 ನಿಂಗಡ ತೊಂಬೆ ಬೇವ!  
 ಸಂಸಾರಕ್ ಕೊಡ್‌ಕತಿ ಗೋಳ್  
 ಪಾಳಾಪ ಪೋಣ್ಣ್‌ಮಕ್ಕಡ ಬಾಳ್.

## ಪ್ರೇಮಿರ ಕೆಮಿ ತಕ್ಕ

ಓ ಪ್ರೇಮಿ

ಪ್ರೀತಿ ಎಣ್ಣಾವದ್

ಪಾಲರನ್ನನೆ ಪವಿತ್ರ,

ನಿಷ್ಕುರ ಎಣ್ಣಾವದ್

ಖಿನ, ಕಠಿಣವಾನ

ವಿಷತಾರನೆಕೆ ಕರೋರ!

ಈ ಪ್ರೀತಿ ಎಣ್ಣಾವ


ಪಾಲಕ್ ವಿಷ ಎಣ್ಣಾವೊ

ನಿಷ್ಕುರತಾರ ಒರ್ ತುಳಿ

ಬೂಕಿತ್ ಪಾಳ್

ಮಾಡ್‌ಚೇಂಗಿ ನಂಗಡ

ಬಾಳ್ ಗೋಳಾಪ?!



## ಪಾಪರ್

ಪೊಣ್ಣ್ ಉಂಡೇಂಗಿ ಚೋರ


ವಡಿಯಂಗ ನೋಟುಲೆ ಬಾರ್!

ಎಡ್‌ತವತೆ ಪೋಚೇಂಗಿ ಕೈರ್

ಆಪ ಪೂರ್ತಿ ಪಾಪರ್.


## ಒಳ ಗುಟ್ಟು

ಆಚಿ ಬಯತ್ ನಾಪತೆಟ್ವ  
 ಮಂಡೆಕ್ ಕಪ್ಪ ರಂಗ್ ಇಟ್ವ  
 ಒಳ್‌ಪಿಚಿಟ್ಟಿತ್ ಬಯತ್‌ರ ಗುಟ್ಟು  
 ಕನ್ನಡಿಕ್ ಮಾತ್ರ ಗೊತ್ತ  
 ಅಯಿಂಡ ಒಳಗುಟ್ಟು  
 ಪರಿಯಲೆ ಅದ್ ಪೊಟ್ವ!!!



## ಬಿಸಿ

ಮಾಡಿಯಳೇ ಇನ್ನನೆ  
 ತಾಂಡ ಚಾಯಿ ಬೋಜಕ್  
 ಕ್ಕಣ್ಣಂಗಡ ಹೊಗಳಿಕೆ-  
 ತಕ್ಕಾರ ಬಿಸಿ ಮುಟ್ಟ್‌ಚೀಂಗಿ ಮದಿ,  
 ಮಳ್‌ಂಜಿ ತಿರರ ಮಾದಾರಿ  
 ಕರಿತ್ ನೀರಾಯಿ ಪೋಪ.



## ಪರಿಯುವಕಾಗ

ಕುಡ್‌ಚಿತ್ ಅಮುಲಾಯಿತ್  
 ಸೀನೇತಂಗಡ ಕೂಡೆ  
 ಗುಟ್ಟಾನ ಸ್ವಂತ  
 ವಿಷಯತ್‌ನ ಪರಿವಕಾಗ!  
 ಪ್ರೇಮತ್‌ರ ಅಮುಲಾಲ್  
 ತಾಂಡ ಸಂಸಾರತ್‌ರ  
 ಒಳಗುಟ್ಟಾನ ತಾಂಡ  
 ಪ್ರೇಮಿರ ಕೂಡೆ  
 ಬಹಿರಂಗ ಪಡ್‌ತುವಕಾಗ!




## ತೊಳಿ ಚಾಯಿ

ಪೂ ತೋಟತ್ ಪೂ  
 ಬೀಂದಿತಿಪ್ಪದ್  
 ತೋಟಕ್ ಚಾಯಿ  
 ಮಕ್ಕಡ ತೆಳಿಕಳಿ  
 ಮನೆಲುಂಡೇಂಗಿ  
 ಮನೆಕ್ ಚಾಯಿ.


## ಕೊದಿರ ಬೆಂದು

ಮೆರ್‌ಪಕಾಗ ಇಂದ್  
 ನೀ ನಾಕ್ ಸಹಾಯ  
 ಮಾಡ್‌ನದ್ ಅಂದ್.  
 ಸಹಾಯ ಮಾಡ್‌ನದ್  
 ಆಯಿತಿಕ್ಕು ಒರ್ ಬಿಂದು,  
 ಕಷ್ಟ್‌ರ ಸಮಯಕ್  
 ಆನದ್ ನೇರಾಯ್ತು ಸಿಂಧು  
 ಆನಗುಂಡ್ ನೀನಾಡ  
 ಕೊದಿರ ಬೆಂದು.




## ಕಲೆರ ಕುಲೆ

ಓ ಎಳ್ತಕಾರ  
 ಶ್ರದ್ಧೆ ಭಕ್ತಿಲ್  
 ಸರಸ್ವತಿನ ಪೂಜಿತ್  
 ಸೇವೆ ಮಾಡಂಡು  
 ಸಾಹಿತ್ಯ, ಸಾಂಸ್ಕೃತಿಕ ಕಲೆನ  
 ಬೇಕಾಬಿಟ್ಟಿ ಮಾಡಿತ್  
 ಮಾಡಂಡ ಅದ್‌ಂಡ ಕೊಲೆನ.




## ಎಂಥ ಪ್ರಯೋಜನ?

ನಂಗಡ ಬದ್‌ಕ್‌ಕ್ ಅವಶ್ಯವುಳ್ಳಚ್ಚಕ್  
 ಕೂಟಂಡು ಆಸ್ತಿ ಪಣ  
 ಕೂಟಿ ಬೆಪ್ಪಕಾಗ ಜಾಸ್ತಿ ಪಣ  
 ದಾನ ಮಾಡಂಡು ತನು ಮನ ಧನ,  
 ಇಪ್ಪಕಾಗ ಸ್ವಾರ್ಥವುಳ್ಳ ಮನ,  
 ವ್ಯರ್ಥ ಅಪ ಜೀವನ  
 ಅಕ್ಕ ಬದ್‌ಕಿತ್ ಎಂತಹ ಪ್ರಯೋಜನ!



## ಪೂ ತೋಟ

ಹೃದಯ ಎಣ್ಣೆವದ್  
 ಒರ್ ಪೂತೋಟ  
 ಅದಲ್ ಆಸೆರ  
 ಮೊಗ್ಗ್ ಬೋಂಡ್ಯಚ್ಚಕ್  
 ಬೀಂದ್ ಕಾಂಬ.  
 ಬೀರತೆ ಬಾಡಿಪೋಪದೇ  
 ಚೆನ್ನ ದುಂಬ.



## ಒತ್ತೋರ್ಮೆ ಇರಂಡು

ಕಾಕೆರ ಮುದಾರಿ ಕಷ್ಟ ಸುಖಿಕ್

ಒಂದಾಯಿತ್ ಇರಂಡು

ಬೆಂದು ಚಂಜಾದಿಯ

ತೇನ್ ಪುಳುವಡ ಮುದಾರಿ

ಒತ್ತೋರ್ಮೆಲ್ ಕೂಡಿತ್

ಮಾಡಂಡು ಕೆಲಸ ಕಾರ್ಯ,

ಇರುಪುವಡ ಮುದಾರಿ


ಮಾಡಂಡು ಕೆಲಸತ್

ಶಿಸ್ತ್‌ಗತ್ತ್ ಬೆಚ್ಚಿತ್ ಕಾರ್ಬಾರ್

ಮನೆ ಪಕ್ಷಿಯಡ ಮಾದ್ರಿ

ಇರಂಡು ಚೆರಿಯ ಸಂಸಾರ

ಅದೇ ಸುಖ ಸಂಸಾರ.




## ಬದ್‌ಕ್

ಬೇವು-ಬೆಲ್ಲತಾರ ಮುದರಿ

ನಂಗಡ ಬದ್‌ಕ್ ಇರಂಡು


ಪಾಲ್ ತೇನಾರ ಮುದರಿ

ನಂಗಡ ಪ್ರೀತಿ-ಪ್ರೇಮ ಇರಂಡು.




## ಸ್ವಪ್ನ ಸುಂದರಿ

ಮೀನ್‌ರನ್ನೆಕೆ ನೀಡ ಕಣ್ಣ್  
 ಗಿಣಿರನೆಕೆ ನೀಡ ಮೂಕ್  
 ಪಾಂಬುರನ್ನೆಕೆ ನೀಡ ಜಡೆ  
 ಕೋಗಿಲೆರನೆಕೆ ನೀಡ ಪಾಟ್  
 ನವಿಲೆರನೆಕೆ ನೀಡ ಆಟ್  
 ಜಿಂಕೆರನ್ನೆಕೆ ನೀಡ ಓಟ್  
 ಚಿಟ್ಟೆರನ್ನೆಕೆ ನೀಡ ಮನಸ್ಸ್  
 ನೀನೇ ನಾಡ ಸ್ವಪ್ನ ಸುಂದರಿ.



## ಸ್ಫೂರ್ತಿ


ಓ ಪ್ರೇಮ  
 ನೀಕ್ ನಾನ್  
 ಕಟ್ಟಿತ್ ಎಳೆದಾನ್.  
 ಪ್ರೇಮ ಪತ್ರ  
 ಇಂದ್ .....  
 ನಾಡ ಕವಿತೆಕ್  
 ಬಲ್ಯೋರ್ ಸ್ಫೂರ್ತಿ.






## ಮೊವ್‌ಪು-ಕಯಿಪು

ಐಲಾಟ ಪಿತ್‌ಲಾಟ  
 ಕೇಡ್ ಕ್ಯಾತರೆ ಮಾಡಿತ್,  
 ಕುಷಿಪಡ್‌ವದ್  
 ತೇನೊರಚ್ಚಕ್ ಮೊವ್‌ಪು  
 ಆಚೇಂಗಿ ಅದೇ  
 ತಡಿಕ್ ಕೇಡ್.  
 ಸತ್ಯ ಧರ್ಮ ನ್ಯಾಯ ನೀತಿಲ್  
 ನಲ್ಲ ಬಟ್ಟೆಲ್ ಪೋಪದ್  
 ಕಯಿಪುರಚ್ಚಕೇ ಕಷ್ಟ  
 ಆಚೇಂಗಿ ಅದ್ ತಡಿನೊ  
 ಮರ್ಯಾದಿನೊ ಕಾಪಾಡುವ.



## ನಾಸ್ತಿಕ

ದೇವಳೇ ಇಲ್ಲೆಂದ್  
 ವಾದ ಮಾಡಿಯಂಡ್ ಇಂಜ  
 ಒರ್ ನಾಸ್ತಿಕ, ಸೌಖ್ಯ  
 ಇಲ್ಲತೆ ಬುದ್ಧಂಡಿಪ್ಪಕ  
 ನಾರಾಯಣ ನಾರಾಯಣಾಂದ್  
 ಎಣ್ಣಿಯಂಡ್ ನೆರ್‌ಕ್‌ಚಿ.



## ಕಳಕರ್ತರ್

ಕಳಕರ್ತರ್ ಮೂಡರ್

ಪಕ್ಕ ಬಕ್ಕು ಜನ ನೂರ್

ಎಲ್ಲಾ ಸೂರೆ ಆನದು


ನೋಟುಲೆ ಅವಳ ದಾರು,

ಕಳ್ಳ ಕುಡಿಯ ಸಿನೇತಂಗಡ ಪಕ್ಕ,

ಬಾರ್ಕ್ ಬಕ್ಕು ಜನ ನೂರ್,

ಚೋಬ್ ಖಾಲಿ ಆನದು

ಅವಂಡ ಪಕ್ಕ ಬಪ್ಪುಲೆ ದಾರು.



## ಪಾಪರ್

ರೇಸ್ ರೇಸ್‌ಂದೆಣ್ಣಿಯಂಡ್

ಮೀಸೆ ತಿರಿಕಿಯಂಡ್

ಪೋನ ಬಾಲೆಕಾರ


ದುಡ್ಡಾರ ಆಸೆಕ್

ಕುದುರೆರ ಬಾಲಕ್

ಕಟ್ಟುವಂಜಿ ದುಡ್ಡ್

ಕಳದಂಡ್ ಆಚಿ


ಬಲ್ಯ ಪಾಪರ್.



## ನರಿ ಮಂಗಲ


ಪಂಡ್ ನರಿ ಬೋಟೆಲ್  
 ನರಿನ ಕೊಂದ ಬಂಬಂಗ್  
 ಪೇಟೆಲ್ ಮೆರವಣಿಗೆ ಮಾಡಿತ್  
 ಕಯಿಪ ಇಂಜತ್ ನರಿ ಮಂಗಲ

ಇಂದ್ ಬೋಟೆಲ್  
 ನರಿನ ಕೊಂದವಂಗ್ ಪೋಲೀಸ್ ಮಾಂವೊ  
 ಕೈಕ್ ಕೋಳ ಇಡುವಂಜಿ  
 ರಸ್ತೆಲ್ ಮೆರವಣಿಗೆ ಪೋಯಿತ್  
 ಮಾಡುವ ಜೈಲ್‌ಲ್ ಮಂಗಲ.




## ಕಳ್ಳ ಕುಡಿಯ

ಪರಮಾತ್ಮ ಎಲ್ಲಿ  
 ಅಡಂಗಿತ್ ಉಂಡ್‌ಂದ್  
 ಎಣ್ಣೆತ್ ಒರ್ ಸಾಧು  
 ಕುಡ್‌ಕನ ಕೇಪ,  
 ಅಕ್ಕ ಅಂವೊ  
 ಬ್ರಾಂಡಿ, ವಿಸ್ಕಿ, ರಮ್‌ಲ್  
 ಉಂಡ್‌ಂದ್ ಎಣ್ಣೆರುವದಾ?




## ವೆತ್ಯಾಸ

ಪಂಡ್ ರಾಜ ಜನಡ  
 ಕಷ್ಟ ಸುಖಿತ್ ಕೇಪಕ್  
 ಮುದ್ದಾಯಿತ್  
 ಜನಡ ಪಕ್ ಬಪ್ಪಯಿಂಜತ್.  
 ಇಂದ್ ಮಂತ್ರಿನ  
 ನೋಟುವಕ್ ಜನ  
 ತಾಂಡ ಕಷ್ಟ ಸುಖಿತ್‌ನ  
 ಎಣ್ಣುವಕ್ ಕಷ್ಟಪಟ್ಟಿತ್  
 ಮುದ್ದಾಯಿತ್ ಪೋಪ!




## ಬೆಲೆ

ಕಣ್ಣಾರ ಎದಿಕೆ ಕಾಂಬ ವಸ್ತುನ  
 ಸರಿಕ್ ನೋಟಿಯವತೆ  
 ಉದಾಸೀನ ಮಾಡ್‌ನದ್,  
 ವಸ್ತುನ ಕಳಂದಂಡ,  
 ಪಿಂಞವೇ ಗೊತ್ತ್  
 ಅಂಡ ನೇರಾನ ಬೆಲೆ.



## ದುಂಬಿ-ಪೂ

ನಾ ದುಂಬಿ  
 ನೀ ಪೂವ್  
 ನಾ ಬಂದ  
 ನಿನ್ನ ನಂಬಿ,  
 ನೀಡ ಪಕ್ಕ  
 ಉಂಡ್ ಮಕರಂದ  
 ಅದ್‌ನ ಊತ್‌ವಕ್  
 ನಾಕ್ ಪರಮಾನಂದ.




## ಆಸೆ

ನಾಡ-ಆಸೆ  
 ಪೋಲ್ ಕಾಂಬ  
 ಸೂರ್ಯಂಡ ಮಾದಾರಿ  
 ಒಂದೇ ಒಂದ್ ಬಲ್ಲದ್  
 ಅವಡ-ಆಸೆ ಎಣ್ಣೆವದ್  
 ಆಕಾಶತ್ ಉಳ್ಳ  
 ನಕ್ಷತ್ರತಾರ ಮಾದ್ರಿ  
 ಲೆಕ್ಕ ಇಲ್ಲತಚ್ಚಕ್.




## ಒಡಂದ ಪಾಲ್

ಬೇಜವಾಬ್ದಾರಿಲ್  
ಎಚ್ಚರ ತಪ್ಪಿತ್  
ತಕ್ಕ ಪರಂದದ್  
ಅವಂಡ ಸ್ನೇಹಕ್  
ಒರ್ ತುಳಿ  
ಪುಳಿ ಬುದ್ಧಿತ್  
ಒಡಂದ್ ಪೋನ  
ಪಾಲಾರ ಮಾದರಿ ಆಚಿ.




## ಮಹಾ ಕಾದಂಬರಿ

ಈ ಜಗತ್‌ನ ಬ್ರಹ್ಮ  
ಸೃಷ್ಟಿ ಮಾಡಿತ್ ಎಳ್ಡನ  
ಒರ್ ಮಹಾ ಕಾದಂಬರಿ !  
ಓದ್‌ನಚ್ಚಕೂ ತೀರತ  
ಆದ್ಯ ಆಖೀರಿರ  
ಪಾಳೆ ತೇಡ್‌ಚೇಂಗಿಯೂ  
ಕೊಟ್ಟತ ಬಲ್ಯೋರ್  
ವಿಶ್ವ ಕಾದಂಬರಿ.




## ಮೂಡಿರ ಪ್ರಶ್ನೆ

ಓ ನಾಡ ಪ್ರೇಮಿ  
 ನೀನ್ ನನ್ನ  
 ಮಲ್ಲಿಗೆ ಪೂ  
 ಚಪ್ಪೆ ಪೂ, ತಾವರೆ ಪೂ,  
 ಡೇಲಿಯ ಪೂಕೆಲ್ಲಾ  
 ಎನ್ನಂಗ್ ಹೋಲ್‌ಚಿಡುವಿಯಾ  
 ಆ ಪೂವೆಲ್ಲಾ  
 ಒರ್ ದಿನ ಚೂಡಿತ್  
 ಬಾಡಿತ್ ಕಣ್ಣ್‌ರ ಮಿಂಞಾಲೇ  
 ಕಾಂಗತಾಪ.  
 ನಾ ನೀಡ ಬಾಳಾಲ್  
 ಪೊನ್ನಾರ ಪೂವಾಯಿತ್  
 ಎನ್ನಂಗ್ ಇಪ್ಪಕಾಗ?




## ಚೆಡಿ

ಮೂಕಾರ ಮೀದ ಇಪ್ಪಕಾಗ ಚೆಡಿ  
 ಮುಂಬಲ್ಲ್‌ಕ್ ನಾಶ ಮುಂಚೆಡಿ  
 ಚೆಡಿನುಂಡ್ ಪಾಳಾಪ ಅಯಿಂಡ ತಡಿ  
 ಶಾಂತಿ ಸಮಾಧಾನತಿಪ್ಪಾನ ಚೆನ್ನ ಪಡಿ.




## ಕೋಲಂಬಲೆ

ಮೋಸತಾರ ಬಲೆಕ್  
 ಬೂಕುವಕ್ ಉಳ್ಳದ್  
 ನೀ ನೆಜ್ಜು .....  
 ಬಲೆಂದ್ ಗೊತ್ತಾಕತೆ  
 ಆಂಡ ಆಕರ್ಷಣೆಲ್  
 ಬಲೆಕ್ ಚಿಕ್ಕೊನ ಒರ್  
 ದುರಾದ್ಯಷ್ಟ ವಲಂಜಿ ನಾನ್.



## ಜಸ್ತ್ ಪಾಸಾ

ನಾಡ ವಿದ್ಯಾರ್ಥಿ ಜೀವನತ  
 ಎಚ್ಚಕೋ ಪರೀಕ್ಷೆಲ್  
 ಬೊತ್ತತೆ ಬೊರಂಡತೆ  
 ಪರೀಕ್ಷೆಕ್ ಅಳತಿತ್  
 ಫಸ್ತ್ ಕ್ಲಾಸ್ ಪಾಸಾಯೆ  
 ಆಚೀಂಗಿ ಮಂಗಲಾ  
 ಎಣ್ಣೊವೊ... ಮೂಡಿ  
 ನೋಟ್‌ವೊ... ಪರೀಕ್ಷೆಲ್  
 ಜಸ್ತ್ ಪಾಸಾನ.





ERROR: undefined  
OFFENDING COMMAND: '~

STACK: